



UNIVERSITÄTS-
BIBLIOTHEK
PADERBORN

Universitätsbibliothek Paderborn

Außlegung der Episteln vnd Euangelien: von Ostern bis auff das Aduent

Luther, Martin

Wittemberg, 1547

VD16 L 5614

11 Geistliche gaben sollen alle zur einigkeit der Kirchen gebraucht werden

urn:nbn:de:hbz:466:1-37032

Wiewol es war ist/ das furnemlich beide/ die gaben vnd krefte/ vmb der Empter willen in der Christenheit gegeben werden / Denn das man die selben (sonderlich das Predigampt/ welches ist das höchste vnd furnemste) führen vnd ausrichten möge / da gehören auch Leute zu/ die für andern geschickt seien/ die Schrifft verstehen vnd anlesen/ der sprachen kändig seien vnd reden können etc. So müssen auch dabey sein die Krefte oder thaten / so Gott wircket/ das sie etwas schaffen vnd ausrichten/ Vnd komen also alle drey stück zusammen vber einerley götlichem regimēt in der Kirchen/ das Christus ist der Herr / des die Empter sind/ vnd die selben ordnet vnd erhalt/ vnd dazu Gott seine krefte/ vnd der heilige Geist seine gaben gebe.

Weil aber solche Empter auch mancherley vnd ungleich sind / (gleich wie die gaben) eines grösser/ das ander geringer / als / ein Apostel ist mehr/ denn ein Lerer oder Anseher/ Teuffen ist geringer dem predigen/ So sol man doch wissen/ vnd ansehen (spricht S. Paulus) das sie alle eines einigen Herrn sind / vnd der ein grösser oder höher Ampt hat / sich nicht darumb besser düncken lasse/ noch andere verachte/ Sondern wisse/ das sie alle einem Herrn dienen/ der geringste so wol als der grössste/ Vñ der in geringem Ampt ist / darumb nicht weniger bey seinem Herrn ist/ widerumb auch/ wer ein höher Ampt führt/ darumb auch nicht für jm mehr gilt / Denn er ist vnd bleibet allzeit ein Herr aller zu gleich/ vnd ist eines so wol als das ander / sein ordnung vnd befel/ Darumb wil er auch vber solchem keine trēnung noch secten gemacht haben / sondern viel mehr durch solche mancherley gaben/ Empter etc. zur einigkeit gedienet haben.

So ich predige/ vnd du zuhörest/ das ist wol nicht einerley gabe oder Ampt/ aber doch dienesu Christo mit zuhören/ so wol als ich mit predigen/ Denn es ist einerley Christus/ der durch dich oder einen andern predigt/ die Schrifft verklet/ teuffet/ tröstet etc. vnd gehet alles aus ordnung vnd befel/ des selben/ der mir so wol befohlen/ sein Wort zu hören/ als dir zu predigen) vnd in ei-

nerley Glauben vnd Geist/ Vnd preisen hie alle zu gleich einen Herrn/ Du sprichst/ Das Wort/ so ich höre/ ist das rechte Gottes Wort/ So sage vnd beweise ich/ als ein Prediger/ auch eben das selbige.

Also wenn ich teuffe/ Sacrament reiche/ vnd absoluiere/ vnd du solches empfehest oder annimpst/ da sind wir beide in eines Herrn dienst/ vñ richten seinen befel/ aus/ vnd gehet einig vnd einrechtlich zu/ ob wol ich vñ du/ nach dem Ampt vnd gaben/ zweierley sind.

Das ist aber auch der Christen eigene Kunst/ vnd das furnemste/ so sie vnd die Heiden scheidet/ das sie wissen vnd erkennen/ das solche gaben/ empter vnd krefte/ Gottes vnd des Herrn Christi / vnd heiligen Geistes / sind / Denn solches erkennet vnd sihet die Welt nicht/ ob sie gleich auch Gottes gaben hat / vnd brauchet aller seiner Creatur/ nicht anders / denn wie eine Saw/ die zu jrem trog leufft/ vnd mit allen vieren drein felt / denckt nicht mehr/ denn wie sie darin fresse vnd wusle/ Fan nicht ein mal ire augen oder gedanken erheben / wo her sie es habe/ vnd wem sie dafür danken solle.

Das solcher Mensch / so nicht ein Christen ist/ der wird für Gott gar viehisch vnd seiwisch/ vnd die Welt nicht anders / denn ein grosser Sewstal/ so nach Gottes Reich nicht fragen/ noch dencken jm für seine reiche güter vnd gaben an leib vnd seele zu danken/ sondern nur trachten nach jrem trog vnd erbern/ darauff sie ligen als die Mastsew/ zur schlachtung/ wie Jeremias 12. sagt von den Gottlosen/ so die frommen verfolgen/ mit grossem glück/ Du leffest sie frey gehen/ wie die Schafe/ das sie geschlachtet werden / vnd sparest sie/ das sie gewürget werden.

Also gibt er manchem grosse Königsreich / reichthumb / land / haus / keller vnd boden voll / vnd machet jm gross vnd fett/ Aber wenn die Saw wol gemestet vnd fett genug ist/ so reufft man sich vmb den speck vnd würtle / vnd kompt etwa ein Speckschneiter vnd Würtlemacher/ der solche Saw schlachtet/ auff jrem Loben/ Land vnd Leute vñ alles verwürtle vñ umbkeret/ Denn

u iij sic

Auslegung der Epistel/

Welt feret sich nichts an die Straffe/ so sie für jren augen siet.

sie wolten Sew sein / vnd nichts anders/ darumb müssen sie auch wie Sew hingerichtet werden/ Ja wenn gleich die Welt solche straffe höret vnd siet/ feret sie doch jmer fort/ weil sie kan/ bis so lang das der Schlachter auch vber sie kompt/ Denn die Saw bleibt eine Saw/ vnd hat die gabe/ das / wenn gleich eine ander für jren augen geschlagen wird/ so bleibt sie doch sicher vber jrem trog stehen/ vnd fraget nichts dar nach.

Der Christe herrlichkeit/ das sie Gottes gaben er kennen.

Aber die Christen/ ob sie wol müssen vnter solchen Sewen leben/ vnd sich eine zeitlang von jnen mit füssen treten/ vnd mit jren ruffeln stossen lassen/ So haben sie doch ein andere treffliche herrlichkeit/ das sie können jre augen empor heben/ vnd recht ansehen/ beide/ jren Herrn/ vnd seine gaben/ Darumb gehören sie nicht vnter den Sewstal/ die allein zu schlachten geordnet/ sondern wissen / das sie Gottes Kinder sind/ vnd von jm mit gnaden vnd gaben geschnücket/ nicht allein zeitlich/ sondern weil er jnen lab vnd leben gegeben/ welches sie nicht von jnen selbs gehabt/ so werde er jnen auch weiter geben/ was sie bedürffen/ vnd auch ewiglich versorgen.

Herrlichkeit der gaben Gottes in der Christenheit.

Diese können Gottes gaben/ auch so man für die geringsten schätzt/ recht tewer vnd werd achten/ nicht allein vmb seines / des Gebers/ willen/ sondern auch nach dem/ wie sie an jnen selbs sind/ Denn es ist keiner/ der auch die leiblichen gaben Gottes erkennet/ der da der ganzen Welt gut mit einem auge noch geringerm glied an seinem leib lösete. Wie viel höher vnd tewrer sind aber die geistliche gaben/ davon hie S. Paulus redet/ so vns zum ewigen leben gegeben werden. Es scheint nicht/ wenn ein kindlin getaufft/ oder ein betrübter Mensch von sünden los gesprochen wird/ Aber wenn mans recht künd ansehen vnd austreichen/ beide/ das Ampt vnd den schatz/ so da gegeben wird/ So ist aller Könige vnd Keiser Ampt/ macht vnd alle güter/ so die Welt hat / dagegen ein lauter nichts.

Wenn du die person ansiehst/ des Teuffers (welche mag wol ein armes Weib sein) vnd des getaufften/ so ist es

wol gering / Denn des Menschen person schafft vnd machet hie nichts herrlich/ sondern der/ so da heisse ein Gott/ ein Herr/ vnd ein Geist/ Vmb des willen ist das Ampt vnd des selben krafft so gros/ vber alle Keiser/ Könige vnd Herrn/ wie gering auch die Person ist/ Denn damit werden dem Teuffel die Seelen abgewonnen/ aus der Helle gerissen/ vnd zu ewigen Heiligen vnd seligen gemacht. Person vnd Ampt mag gering heissen/ aber es ist gleichwol Gottes Ampt/ welcher ist nicht ein geringer Man/ sondern mehr/ denn hundert tausent Welt/ vnd wirket solch ding/ das die Welt nicht begreifen kan/ vnd alle Engel nicht vermögen zu geben.

Denn ob gleich alle Creatur zusammen setzten/ so künden sie keine Tauffe machen/ Vnd wenn alle Welt zusammen solte ein kindlin teuffen/ so würde es daselbe doch nicht helfen/ wo es nicht dieser Herr vnd Gott befolhen hette. Laß den Türcken viel tausent mal sterben vnd gewaltiger sein/ denn er gesund ist/ so kan er doch mit alle seinem gut/ Land vnd Leuten/ weder in selbs/ noch einigen Menschen von der geringsten sünden entbinden/ noch die Absolutio sprechen/ Gott hat dir deine sünde versgeben/ Denn er hat nicht die Gabe/ Ampt noch werck (ja er weis auch nichts dauon) welche sind Gottes allein/ vnd doch durch Menschen mund vnd hende ausgerichtet werden.

Hie/ darumb preiset vnd rhümet S. Paulus/ das Gott solch gross ding wircke vnd gebe in der Christenheit/ auff das sie solches erkennen/ vnd jm dafür danken/ vnd darin mit demute einer dem andern diene/ in gleichem glauben vnd liebe/ Vnd ein jeder lerne nur herrlich preisen/ wo er siet solch Ampt/ gaben vnd wercken in der Kirchen gehen/ vnd so hoch halte/ als er von Gott selbs helt/ Denn wo er sie nicht selbs geordnet vnd gegeben hette/ so würde freilich niemand der keins haben.

Wie haben wir vnsern eigen thand auffgeworffen vnd erhaben/ Walfart vnd lauffen zu den todten/ in die wildnis/ Blöster/ stricke vnd Rappen etc. Aber was hat es geholffen/ vnd was hatten

Nem an Gottes befeh vnd Ampt von Christo geredet.

Es gibt auch ein Ampt von Christo geredet.